


國學基本叢書
金梁夢月詞





書叢本基學國

詞 月 夢 梁 金

撰 琦 之 周

行發館書印務商

中華民國二十七年七月初版

(88341)

國學基
本叢書
金梁夢月詞 一冊

每冊實價國幣貳角

外埠酌加運費匯費

撰者 周之琦

發行人 王雲五
長沙南正路

印刷所 商務印書館
長沙南正路

發行所 商務印書館
各埠

(本書校對者朱廣福)

金梁夢月詞目

上卷

四字令

阮郎歸 二調

青玉案

一翦梅

蝶戀花 三調

瑞鶴仙

一枝春

西湖月

陌上花

念奴嬌

解連環 二調

金縷曲 二調

三姝媚

聲聲慢 二調

好事近 四調

丁香結

踏莎行

浪淘沙 二調

南樓令

醜奴兒慢

高陽臺 三調

玉漏遲

喜遷鶯

月華清 三調

絳都春

璽瓏玉 二調

望海潮

瑣窗寒

齊天樂 六調

新鴈過妝樓 二調

訴衷情 二調

思佳客 五調

尉遲杯

夢橫塘

江城梅花引

菩薩蠻 八調

洞仙歌

相見歡 二調

清平樂

揚州慢

憶舊游

天香

綠意

摸魚子

下卷

夢芙蓉

摸魚子 七調

望湘人

澡蘭香 二調

高陽臺 三調

滿庭芳

綺羅香 二調

瑣窗寒 三調

采桑子 三調

喜遷鶯令 二調

風蝶令 二調

浣溪紗 十二調

鵲橋仙

三姝媚 三調

催雪

丁香結

瑤花

真珠簾

瑞龍吟

念奴嬌

惜秋華

金盞子

金縷曲

應天長

陌上花

解連環二調

浪淘沙慢

慶春宮

東風第一枝二調

更漏子二調

芳草渡

好事近

絳都春

荷葉杯二調

南鄉子二調

玲瓏四犯

喜遷鶯二調

六醜

一枝春

瑞鶴仙

懷夢詞目附

青山溼徧

西湖月

玉漏遲

沁園春四調

陌上花

月下笛

浣溪紗

四調

桂殿秋

柳梢青

三調

翠樓吟

花心動

夢芙蓉

霜葉飛

倒犯

金菊對芙蓉

洞仙歌

金縷曲

清平樂

二郎神

花犯

慶春宮

多麗

祝英臺近

十調

最高樓

十拍子

十六字令

三調

金梁夢月詞上 王申至丙子

清 祥符周之琦稱圭著

四字令

吟香綺櫳。傳詩翠筒。玉梅纔識春容。釀春光未濃。虹梁半空。魚波萬重。舊時月色相逢。話家山夢中。

阮郎歸

昨宵同賦冶春詞。芳襟暗共期。今朝卻是送春時。紅螺懶更持。來又恨。去還思。淒涼花一枝。哀箏彈損遠山眉。此情金鴈知。

又

朝來春色媚檐牙。晴暉散曙霞。晚來秋影到窗紗。新眉試月華。羅帳倚。繡簾斜。催歸夢未差。紅燈開作可憐花。今宵真到家。

青玉案

西山顏色仍依舊。只添了、眉痕皺。小院珠簾垂永晝。吟箋半摺。畫闌孤倚。長憶分襟後。閒中記曲拈紅豆。風雨還驚夜來驟。曾問南園芳事否。鶯如人懶。花如人醉。春也如人瘦。

一翦梅

春水和李賓石

一鏡煙痕望裏收。咫尺回橋。綠輦香柔。有人扶上木蘭舟。載了春心。蕩了春愁。冶葉傳情恨未休。照影嬋娟。那處妝樓。小紅闌外是西洲。今日東風。明日東流。

蝶戀花

門外垂楊千萬縷。不繫春光。只繫春愁住。文杏巢空雙燕去。紫簫聲裏屏山暮。恨別江郎渾懶賦。一抹煙痕。舊約無尋處。五里東風三
里雨。蘼蕪吹冷天涯路。

瑞鶴仙

屠琴鵑舊寓米市胡同雙藤老屋。諸同志時時觴詠其間。距今三載矣。嘉慶壬申春杪。琴鵑真州書來。重話疇曩。因賦此闋。爾時同集者。劉芙初、董琴南、朱勳楮、謝向亭、錢衍石、賀耦庚、琴鵑及余爲八人。皆戊辰同年友也。

素天分鴈軫。話夢影揚州。月痕初暈。情波寄蘭訊。又魚箋手擘。麝煤心印。琴歌興引。且漫說游蹤未準。但匆匆。側帽吟來。輸與舊時青鬢。還問雙藤在否。絡架扶牆。幾番紅褪。交枝翠隱。蒼蘚路。有誰認。怕幽禽忘了。花魂清瘦。卻道棲香正穩。倚黃昏。闌角尖風。峭寒自忍。

一枝春

白芍藥

婪尾杯深。殿羣芳付與。伶俜花影。嬌姿澹掃。不許綺羅人並。薔薇臥

晚記曾共。曲闌閒凭。空自把、情淚偷含。夢入瑣窗烟冷。蒲葦素波
低映。漸韶華過卻。將離折贈。東風倦眼。到得粉融酥凝。濃春未了。問
誰見、玉奴妝靚。還更怕、殘月揚州。杜鵑喚醒。

西湖月

題孤山放鶴圖

巢居不鎖仙心。弄遠影、褊襦絳霄風穩。素裳縞袂。澱湖十里。翠峯千
仞。圓吭清響遞。更兩兩、瑤笙松吹引。儘戀著、嶺畔梅花。肯說玉京飛
近。輒紅我尙淹留。歎蕙帳塵空。怨懷誰訊。故園秋矣。襜褕瘦。翻不
堪重認。芝田歸有路。但倦羽、商量期未準。枉回首。夢裏青山。白雲無
盡。

陌上花

七夕

雙星寄語。紅羅亭上。舊香誰採。麗句南唐。吹冷半空仙籟。當時恨與東流去。容易朱顏催改。慶長生唱出。鳳簫一曲。悶持羅帶。話前因夢裏。填橋烏鵲。那見纖雲飛蓋。片石支機。還是聘錢難貸。占絲鈿合空相約。孤負西樓人待。但清秋認取。梧桐深院。賦情猶在。

念奴嬌

陶然亭懷芙初

江亭送客。話西風一笛。清游曾記。已是離愁消未盡。禁得危闌重倚。別浦凝陰。回塘弄晚。搖漾滄洲意。前番衰柳。向人還又憔悴。長恨千里關山。南雲不見。見蒼煙無際。帽影緇塵江上路。多分霜絲難理。潮落秋生。水涼夢遠。休喚眠鷗起。相思何許。白蘋紅蓼鄉裏。

解連環

雪意

畫檐岑寂。送寥空倦眼。亂鴉飛急。護凍雲、戲玉猶慳。任翦取鳳翎。不成拋擲。睡起癡龍。但小試、殘年風色。照銀燈、點點絮粉淚痕。何處相識。幽尋灞橋路隔。對薰爐篆縷。清夢難覓。做幾番、酒醒天寒。喚山寺夜鐘。水樓長笛。萬里蒼茫。倩誰問、飛瓊消息。折梅花、故人故里。寄愁未得。

金縷曲

芙初殘臘抵京。況味寂寥。次韻賦贈。

玉學春風煖。儘宵深、爐香飄盡。燭花燒短。店月橋霜經行處。縷縷夢魂誰管。向竹裏、今番重款。別淚青衫痕猶凝。料琵琶、聽徹歌聲輦。聞細數、鴈程緩。征塵寫入江南怨。自沈吟、紫簫非舊。翠衾空展。燕麥元都無人問。況是素絃聲斷。更休訴、京華游倦。鷗鷺江湖還漂泊。甚閒雲、容易隨舒卷。回首處、晉陵遠。

又

夜坐疊前韻

畫鴨香心煖。倚黃昏、歲殘時序。漏長檠短。官閣梅花開猶未。吹破一枝羌管。念獨夜、清尊誰款。彈指春光天街近。漸東風、颺得紅塵輾。吟擁鼻、數聲緩。金梁此夕。嘒鴉怨。黯消凝、舊山圖畫。不堪重展。烟夢淒迷無尋處。多事彩雲吹斷。算願曲、心情都倦。喚起青鸞歸飛去。看樊樓、十二珠簾卷。千里外、寄愁遠。

三姝媚

櫻桃

垂檐紅半鞦。漸錫簫吹殘。茶蘼開過。乍啓脣朱。趁小腰蠻舞。玉顏初破。禁苑偷銜。憐蘸羽、鶯黃微婉。記憶妝樓。閒折嬌春。粉香千朵。還對珍叢婀娜。問露液承盤。爲誰輕墮。翠籠分攜。送錦鞍歸去。悶拈珠

穎。寄達年年。將恨與、鮫綃俱裹。怕說杯停婪尾。繁陰夢鎖。

聲聲慢

偕邵季若自窯臺步至江亭。菰蒲蕭蕭。殊有濠濮間意。

鉤藤礙屐。帶草牽衣。循途恰轉回塘。鏡曲幽尋。疎磬漸引雲房。脩然半郊半郭。浣塵纓、慣詠滄浪。聽醉語、只山僧一笑、識我清狂。回首前游幾日。又西風吹換。石冷苔荒。倦柳依依。猶戀澹薄秋光。沙鷗漫留後約。怕重來、老卻斜陽。歸未得、但憑高、還睨舊鄉。

解連環

癸酉秋奉使井門。行次恆山驛。晉豫分道處也。太行山翠。紛來邀客。隔河南望。鄉思黯然。賦寄伯兄次珩。

驛塵三輔。向郵亭繫馬。晚鐘敲雨。看荒垣。幾日清秋。恰疎柳當門。鎮牽離緒。半枕黃梁。問短夢、今宵何處。任吟箋唾溼。畫燭淚深。歸思難

賦。滹沱去程記否。料重尋往跡。爪印非故。儘思量、南走邯鄲。盼漳水銅臺。舊鄉雲樹。喚客山靈。又相約、明朝西去。寄愁心、鴈飛鴈落。夜長自語。

好事近

輿中雜書所見得四闋。

杭葦岸纔登。行入亂峯層碧。十里平沙淺渚。又渡頭人立。筍將搖夢上輕舟。舟尾浪花溼。恰好烏篷小小。載一肩秋色。自獲鹿至井陘。日三四問渡。

又

詩句夕陽山。扇底故人曾說。好是固關西去。看萬山紅葉。翠蛟潭上認題名。展齒爲君折。驀地蘚花濃處。出一雙胡蝶。陳受笙畫扇贈行題詩有好山都在固關西之句。

又

峻坂怯肩輿。引綆兩行猶弱。幾日牽船岸上。只蒲帆難著。一聲碧
月大隄頭。舊夢定誰託。何似春風天半。挽秋千紅索。入太行道中。輿前以索挽之。

又

引手摘星辰。雲氣撲衣如溼。前望翠屏無路。忽天門中闕。等閒雞
犬下方聽。人住半山側。行踏千家檐宇。看炊煙斜出。南天門尤陡峻。人多登巖而居。

丁香結

雙柏堂偶述。用周美成韻。

屋角煙疎。井闌人寂。纖影月蛾低隕。歎流光輕迅。玩素景路指苔階
蒼潤。倦懷曾見否。新寒試袖薄更忍。天涯凝想粉淚。定逐爐香飄盡。
秋引。正暗葉吟商。夢覺南雲鴈陣。鈿尺閒拋。紋衾靜倚。一燈初暈。
憑寄歸羽信息。送喜箋盈寸。聯萸屏清詠。猶及霜紅未損。

踏莎行

勸客清尊。催詩畫鼓。酒痕不管衣襟污。玉笙誰與唱消魂。醉中只想
昔騰去。綺席頻邀。高軒慣駐。悶來卻覓棲鴉語。城頭一角晉陽山。
怪他青到無人處。

浪淘沙

擬游晉祠不果

雉堞幾憑闌。拄笏空看。叢祠依舊鎖雲關。如此嵐光渾不識。羞渡桑
乾。碧玉瀉潺湲。流水生寒。一聲涼鴈最無端。桐葉西風多少恨。留
與青山。

南樓令

歸次壽陽驛。霜氣寒甚。

候館閉殘釭。淒淒夜已霜。擁青綾一昔雲涼多事。西風吹恨去。隨冷
月度回廊。秋夢惱疎狂。征衣惜舊香。有閒心。休著思量。憔悴銀屏

山。幾。疊。渾。不。耐。漏。聲。長。

醜奴兒慢

九月十九日望都縣城外書事。

輕塵倦馬。酒醒今宵何處。最愁說。瓊簫花外。半壁儲胥。恨入初程。劍
歌聲悄。壯心孤。圍棋乘興。遲回命展。一著先輸。鼓吹未閒。淒涼官
燭。憔悴軍符。更誰向。平原飛騎。笑挽雕弧。廢壘秋笳。怨吟曾到帳中
無。傷心休問。遼空唳鶴。殘月鳴狐。

高陽臺

客有談衛源近事者。感賦此調。

鳩羽驚媒。龍音感悅。匆匆芳訊偷傳。一紙相思。怨紅嗁溼銀箋。連波
別有牽魂處。甚回文。倦眼曾看。枉猜他。珠腕閒題。粉淚輕彈。無情
河水東流去。打空城。寂寞。螢火飛殘。埋玉誰家。秦簫吹冷荒煙。人閒

多少傷心事。誤南柯、淺醉酣眠。又爭知、孔雀徘徊。運到郎邊。

玉漏遲

耦庚席上賦葛仙米

紺珠塵未埽。綠鸚銜後。黛螺痕小。一捻圓勻。春出玉山香稻。雋味青精漫擬待糝入。羹湯還好。春又早。紅鹽碧醞。者時情抱。相看句漏雲封。只乞米長安。甌塵閒笑。旅食年年。依舊石田荒了。儘把丹砂寄與。怕夢裏、黃梁人老。鄉信杳。知他鴈鴻多少。

開豫中苦飢

喜遷鶯

過米市胡同作

翻階紅藥。尙作意弄晴。雕闌西角。金谷春迷。蕪城天遠。都把俊遊拋卻。悶思去年花發。愁惹今年花落。燕飛盡。問悠悠何處。橋邊朱雀。疎箔。還更啓。閒拂暗塵。夢短憑誰覺。蠟淚黏螢。衣香化蝶。不記那回

行樂舊歡斷魂人往。新侶探芳人約。賞心事。又從頭聽取。柔奴絃索。

月華清

賦得團扇復團扇

小影兜香。圓規倚月。未秋已自惆悵。憔悴回看。幾日乍縈蛛網。記同心。有約相攜。問半面。爲誰羞障。烏巷。負僧彌玉潤。繡窠偎傍。戲蝶游蹤暗想。枉鏡彩重重。細描宮樣。宛轉聲中。禁得倩魂搖颺。掩花容。新恨仍迷。聽絮語。舊情難忘。低唱。付秦淮渡口。那時雙漿。

又

初夏

燕乳飛遲。蠶眠香老。一番婪尾吟後。怕檢羅衫。還怯曉寒襟袖。蘸簾影。綠蔭方重。尋履跡。豔陽難又。孤負。聽鸚鵡花外。那回攜手。伴侶停針話久。但強啓窗紗。悶添晴晝。梔子同心。忍見素紵描就。悔拋卻。

吹絮光陰。任閒到、熟梅時候。依舊。試榴紅。裊裊爲伊消瘦。

絳都春

綠陰

烟絲遠館。乍約住翠雲。回廊遮徧。做暝弄晴。沾惹離愁。愁無限。淒香
滯粉閒凝眊。更誰識、殘紅幽怨。杜鵑何許。匆匆儘把。豔陽催晚。空
戀簪花俊賞。是幾度鏡裏。朱顏偷換。問取倩魂。那信飛鴛吹暹轉。嗚
妝枉隔春風面。剩黛色、眉痕猶見。悄然青子。枝頭恨長夢短。

蝶戀花

送芙初南歸二解

簾底斜陽紅一綫。怕近黃昏。不放銀鈎卷。燭影西堂看又短。金尊只
訝宵來淺。賦罷離情魂欲斷。砧杵誰家。喚起征人怨。冷到秋心秋
不管。芙蓉卻在江南岸。

又

往日題襟同客邸。一樹垂楊。兩兩吟匏寄。小巷城南三五里。等閒化作盈盈水。天上秋雲吹易碎。送得君歸。卻問歸何計。燕子樓臺斜日裏。江南也是消魂地。

高陽臺

仙露菴。宋宮人。錢汪水雲處。

白鴈聲殘。青蛾淚盡。燕臺別路重分。供奉琴歌。不堪彈入離尊。興亡夢短黃冠老。掩金觴。翠袖含顰。歎西湖。卅六離宮。何處長門。當年環珮空歸去。任花旛戀雨。佛火愁人。剩水殘山。依然鈴語黃昏。紅兜那覓南朝寺。話滄桑。舊額猶存。泣銅仙。承露盤傾。一樣消魂。

又

長椿寺明田妃畫像 慈聖李后像並藏寺中

葉落秋槐。花零素柰。驚鴻省識。嗟妝。月影揚州。禁他燕館清霜。九蕙
寂寞閒房。共黯殘僧黃。把司香。儘關心。小閣承乾。前度昭陽。覓裳
未破哀蟬。誅指環妃葬地。金盃銀牀。天壽幽宮。珠旒翻託明璫。相從
好奏西陵伎。比人間。椒殿春長。漫魂歸。一幃芝龕。冷話興亡。

瓊瓏玉

都人夏日賣冰者。以兩銅盞相戛作響。漁洋詩所謂櫻桃已
過茶香減。銅盃聲聲喚賣冰者也。

蓉闕櫻殘早。添得韻事京華。玻璃心盃。喚來紫陌雙叉。妙手巧搗弄
巧。勝肩頭鼓打。小擔聲譁。停車裁油雲。隔住玉沙。暗想槐薰倦午。
正窗閒雪藕。鼎怯煎茶。碎響玲瓏。問驚回好夢誰家。屏間珠喉輕和。
有多少。鈴圓磬徹。低唱消他。晚香冷。伴清吟。深巷賣花。
兒童賣晚香玉聲亦可聽

又

瓦噴壺

清暑簾陰。晚風送、枕簟蕭蕭。陶家製出。買春不是詩巢。幾陣階前遞響。早千絲玉濺。一白珠跳。涼宵。還相催。金井桔槔。未擬官哥樣好。但瓶長較頸。鼓細量腰。貯腹泉甘。尙虧他、淺潤堂坳。壺公僊蹤曾託。更休把、冰清心跡。瓦合輕嘲。雨來也。掃煩襟。如意漫敲。

望海潮

送勳楣出守瓊州

銀籠飛蓋。油幢濺雪。春風乍到南天。閩嶠句題。君時取道福州羊城路指。羅浮青入雙鬟。烟靄護旌旂。早滄溟咫尺。催渡樓船。竹馬人來。幾聲銅鼓唱喧闐。吟心臥閣清閒。想梳榔未老。胡蝶猶仙。蜃雨弄晴。蠻花醉曉。珊瑚十萬瓊田。一酌試廉泉。問深沈合浦。可有珠還。掃盡樓臺。蜃氣吹笛海門山。

瑣窗寒

紫泉孝廉李賓石。余再從姊婿也。病樹不春。曇花遽萎。煢煢
菱緯。其可哀已。

聽雨沾春。題花卜夜。勝游曾幾。書傳鴈羽。有約玉簫同倚。踏松陰。依
然斷腸。素絃一昔。牙琴碎。過招提。倦旅當時。燈暈尙飄紅穗。誰寄
相思意。但絮影埋香。酒痕吹水。秋墳怨語。悽入女嬃砧裏。話傷心。孤
雛未將。紙錢那覓。空燕壘。判今生。塵面西風。爲君持淚洗。

齊天樂

寒雲

沈寥千里寒空色。誰教玉龍輕占。望裏仍飛。愁邊又聚。不許梨花香
泛。陽臺恨斂。漫提起。巫峯。那回春感。夢雨蒼涼。楚腰羞向近來減。
探梅曾約舊幃。鶴衣尋徑處。幽賞空念。澹欲黏天。濃應釀雪。贏得今

番淒黯。山螺翠掩。更隱約疎林。墨痕低染。界破冥濛。冷鴉三四點。

又

寒月

廣寒已是消魂地。西風況禁悽惻。鶯嶺初升。鴛樓乍映。依約圓冰飛出。澄輝似昔。只酒罷春容。夢孤秋碧。漫憶前身。水精簾下又今夕。青天重訴怨抑。素蟾流影外。難寄消息。悄倚娥妝。閒拋弄藥。一杵元霜空惜。瑤笙夜寂。鬪青女嬋娟。誤他嬌魄。淚點金波。任教菱鏡溼。

又

寒燈

瑣窗閒絮。蠶蟲語。盈盈情魂無定。盞側星孤。盤敲豆小。爭忍挑來還暈。瑤街漏緊。待添了銅荷。玉膏猶凝。夜飲誰家。九蓮花底喚春醒。蘭房幽意自省。背人茸帳倚。金鴨都燼。半翦難勝。雙心暗怯。長盼天

涯芳信。歡期未準。任碧悴紅迷。怨蛾相映。繡被霜濃。一枝空照影。

又

寒柝

暮天吹角。譙門斷。淒音乍聞飄渺。響接砧疎。傳隨箭急。還帶提鈴聲小。嚴城靜悄。伴清漏銅壺。幾番昏曉。逝水年華。爲誰消領舊懷抱。空街敲恨未了。鐵衣來往處。霜信偏早。鷺埃迷煙。雞籌喚月。那更春光不到。離情暗惱。問挑盡殘燈。送愁多少。帳底驚魂。夜長人易老。

又

寒鴉

晚霜天外歸飛急。淒淒噤寒無語。水驛檣稀。河隄樹老。羞說垂楊終古。酸風聽取。問積霰平林。舊巢安否。黯澹叢祠。陣雲吹送楚江暮。蘇臺前事暗數。醉歌人未散。銀箭催曙。叫月聲孤。棲烟夢冷。重憶昭

陽何處。蕭條倦羽。悵子夜。曉殘。白頭還苦。鬢影相看。玉顏空淚雨。

又

寒雀

故枝驚說平林盡。霜天幾回飄泊。畫舫煙迷。朱橋日暮。多少荒涼村落。空倉去卻。歎廷尉門前。苦飢誰託。化蛤餘生。水雲何處夢難著。枋榆重問舊約。燕泥凋粉壁。一樣蕭索。廢壘閒尋。疎梅乍放。且喜幽香堪啖。雕檐半角。更休憶華堂。那時行樂。翠羽清嘯。近來風信惡。

聲聲慢

晨起踏雪詣向亭

街長帽側。徑滑筇扶。斜風乍見飛絲。款竹門深。還更一笑相看。朝來玉樓凍合。怪尖叉、瘦聳吟肩。閒趣好。但塵襟泥酒。醉墨塗箋。容易煙雲過也。甚鴻泥爪印。倦旅依然。冷落詩囊。誰念歲晚長安。冰霜待

尋伴侶。只孤琴。消得清寒。似夢裏。又梅花開了故山。

新鴈過妝樓

琴硯是寶石所贈

暈墨凝香。詩魂化。猶依片玉琳瑯。半規蕉葉。涼信暗翦秋霜。淚眼研
愁書懶寄。更無夢約紫泉莊。黯情傷。廣平似石。特地回腸。紅絲當
時共炙。借錦箋鏤筆。寫怨宮商。斷紋何許。年少慣倚疎狂。而今賞音
漫索。但目送。西風歸鴈行。相思處。在翠蟾鉛水。盈盈一方。

又

冰簪

漏咽銅籤。飛瓊過。瑤笄誤落雕檐。峭風寒翦。新意幻出纖纖。鏤雪鑄
霜簾影下。鏡臺未怯曉晴占。溜痕添。悄移鳳蠟。珠顆教銜。犀椎敲
來尙惜。襯綺疏翠幌。碧潤偷拈。弄妝呵手。春恨暗觸晶匣。鬢雲更誰

試插。但著指。防他清淚淹。芳魂去。待化成嬌玉。花香一簪。

訴衷情

芳徑。人靜。簾外影。曉朦朧。花信早。顛倒任春工。鴛語隔房櫳。匆匆。畫樓今夜風。是殘紅。

又

錦幔斜卷。春意懶。篆香微。人去後。楊柳又如絲。無語對花枝。依依。小園胡蝶兒。恨來時。

思佳客

檢點嬌紅瘦幾分。含情重問可憐春。誰教南浦愁中絮。卻化西樓夢裏雲。吟翠管。步香塵。小闌花影易黃昏。從來怕見初弦月。纔學蛾眉便學顰。

又

帕上新題間舊題。若無佳句比紅兒。生憐桃萼初開日。那信楊花有
定時。人悄悄。晝遲遲。殷勤好夢託蛛絲。繡幃金鴨薰香坐。說與春
寒總未知。

又

寂寞湘簾下玉鉤。一春清景似殘秋。粉消蕙帳情空寄。花褪蘭缸恨
未休。銀鑿落。鈿篋篋。歡場那更問朱樓。雙蛾已是生來淺。禁得西
窗此夜愁。

又

夢語惺忪記未真。起來還倚退紅茵。綠腰枉自翻新曲。藍尾誰能惜
好春。金翦歇。玉爐薰。懶將纖手試寒溫。人間無著相思處。剩檢羅
衣看淚痕。

尉遲杯

歡娛事。甚著眼。都作淒涼字。無聊漫寫雲箋。卻把春情喚起。紅牙妙譜也。儘許歌喉按新製。又爭知。鳳牒重看。俊游空付流水。餘香醉拍征衫。憐刀翦。井州蠟網長繫。冷落花名人。誰識珠淚裏。烏闌半紙。如今縱。天河倒瀉。料難望。銀鉤墨暈洗。但從他。試語初鶯。自尋牆外桃李。

月華清

丙子六月七日晨。詣玉泉山。凍雨初歇。車行積潦中。宛如舴艋。小詩呈李芝齡前輩。十頃玻璃坐渺然。天光如水水如煙。閒情更語淮陰客。要借君家鴨背船。一騎衝波徑轉遙。半灣秋映玉虹腰。石闌干外垂絲柳。知是江南第幾橋。露珠紺影上衣紗。扇底涼痕一倍加。迤邐湖光吟不斷。風香消受萬荷花。並成此解。

短策吟煙。驕驄踐淥。柔波十里如翦。一舸誰攜。恰好徑隨花轉。乍喚
侶。垂柳門邊。更覓路。曲闌橋畔。消遣。向菱灣。蓼溆。等閒尋徧。況是
澄湖漲滿。傍岸背沙脣。鏡匳初展。銀漢盈盈。可許浣紗人見。帶空翠、
半角山孤。蘸秋影。數重天遠。歸晚。正冰綃索句。玉鞭須緩。

夢橫塘

荷葉似雲香不斷。白石句。以慢詞寫之。

液池擎豔。淥沼含馨。溼雲飛滿涼翠。千葉香心。蕩三十六灣秋意。倚
蓋天長。浣衣人杳。卷波無際。認珠盤冷浸。一抹橫塘。重重碧。重重水。
嫣紅半落誰憐。但參差遠影。還蘸吟袂。鷺送鷗迎。料未許。夕陰吹
碎。喚小艇。青匳搖夢。待覓風痕。過烟尾。甚日開門。藕花多處。約詞仙
同醉。藕花多處別開門。亦白石句。

江城梅花引

一雙銀蒜暮丁冬。是東風。是西風。吹得疎疎涼涼雨打梧桐。沈水半消。
金鴨冷。人不見。夢依依。喚玉驄。玉驄玉驄無路通。步霜紅。霜更濃。
過也。過也。過不了。咫尺簾櫳。依舊相思圍住畫闌中。推枕起來還欲
睡。樓角外。又蕭條。聽斷鴻。

菩薩蠻

竹梧重疊交窗影。水紋簾卷冰花冷。燈穗墮空煙。夢回秋可憐。玉
階人不見。絡緯嗁成怨。銀漢信沈沈。碧雲深更深。

又

門前簾幕垂垂護。出門待索銀蟾語。圓影可憐低。曉風吹又西。十
三絃上意。箏柱還搖曳。聽到別情無。一聲金鴈孤。

又

映門衰柳無顏色。長條一夜西風急。人倚小紅樓。闌干天際愁。愁

來天又暮。艇子衝波去。打槳問鴛鴦。鴛鴦秋夢長。

又

朱闌半亞涼波淨。回風綠蘸烟蕪影。烟外幾人家。天涯卽水涯。蓮
衣寒惻惻。蕙帶牽無力。到此合魂消。冷香黏畫橋。

又

輕羅一翦情懷重。海棠冷落西川夢。掩映幾枝斜。瘦痕秋在花。蒼
苔餘繾綣。履跡閒尋徧。無處問東風。亂鴉殘照中。

又

金觴玉筯江淹句。當年南浦愁人處。衰草戀斜暉。王孫歸不歸。悽
悽秋社語。梁燕仍羈旅。倦尾路雙叉。烏衣何處家。

又

芙蓉城上花憔悴。紫泉月冷重門閉。門外夜烏啼。傷心聞擣衣。團

團爭忍見。畫筵愁無限。何處去年人。酒痕沾淚痕。

又

春城買盡麻姑酒。醉來繫馬城邊柳。漂泊十年閒。離情山上山。秣陵書懶寄。舊約空彈指。泉路斷腸時。人閒誰復知。

思佳客

德勝門外兩間房。茶肆題壁一詩。自敘漂泊。楚楚可憐。款署雲間小倩。不知何許人也。賦小詞紀之。並邀芝齡前輩同作。塵壁憑誰護。絳紗。西風涼處見秋花。知音渺渺。憐人世。薄命依依念歲華。吟蕙草。怨匏瓜。吳淞飛絮又天涯。一春夢雨傷心事。休問江南燕子家。

洞仙歌

賓石曩主鍾仰山侍講家最久。偶訪舊館。愴然黃墟之思。用

玉田觀花外集有感韻。

燕歸何處。過烏衣門第。一帶輕烟隔秋水。歎衫痕暈酒。琴語絃詩。三十載。塵世賞音無此。吟魂猶在否。幾葉雲箋。澹墨重尋舊題字。夢蝶不歸來。鏡裏芙蓉。翦霜影。一枝紅碎。有鄰笛。依依故人心。問蠟炬成灰。夜臺知未。

相見歡

鑪香冷了金猊。鏡臺攜。不信生來長見翠眉低。春夢斷。畫闌畔。舊情迷。剛是曉鴉。曉後子規。嘯。

又

一絲秋入雕梁。燕雙雙。暮地庭梧已做十分涼。楚竹簟。越羅扇。漫思量。咫尺畫闌西畔。是斜陽。

浪淘沙

秋蟬和衍石

涼思又銅盤。琴外聲殘。一庭愁碧鎮相憐。冷入秋心飛不去。衰柳年
年。何處說荒寒。落葉長安。西風休更倚闌干。弱羽脩脩真似我。鬢
影羞看。

清平樂

憶梅

尋尋覓覓。竹外人孤立。研粉銀箋題又溼。冷卻翠禽消息。舊時芳
訊依然。而今幽恨年年。一笛綺窗歸夢。故山無奈春寒。

揚州慢

琴隲抵京數日奉諱南去賦此代東

銀管拈愁。玉箋封淚。十年人老藤花。趁飛鳧小影。又斂翼京華。認當
日。題名醉墨。翠陰深處。重拂窗紗。話風流。裙屐多時。香散蜂衙。舊

游過眼。漫低回。身世搏沙。數候館。淒燈歸艫倦枕。殘夢誰家。喚起二分明月。蕪城怨。寫入唳鴉。但潮生潮落。秋聲容易天涯。

憶舊游

題畫

向生綃託興。縹緲襟期。刊落塵緣。異境無人到。望瑤岑。轟筍玉井開蓮。冷光半溼幽翠。烟影散虛壇。想萬壑松風。珠庭近接。渺矣高寒。靈源竟何許。有幾片桃花。流出雲間。漫說丹邱隔。便移家好住。誰耐清閒。石牀自寫琴意。空外揖羣仙。待月白千峯。相攜跨鶴天際看。

天香

水仙花

水豔吟香。花情眷夢。湘皋記共游冶。盡側塗金。簪橫削玉。霧帶碧痕低亞。通詞試託。問甚日、仙魂初化。翠羽明珠不見。依然冷雲凝夜。

銀釭舊愁自寫。倚冰簾薄寒吹麝。一掬茜窗清淚。粉妝慵卸。還恐春風喚起。又暗憶、扁舟古祠下。素襪無聲。凌波去也。

綠意

冬蕉


牆陰翠擢。記綠天深處。題翰曾約。黯黯吟魂。惻惻寒宵。禁他瘦倚欄角。多生已苦秋窗雨。況夢影、霜華凋落。儘故人、書葉留看。早是怨懷難託。誰倩瑤函寄語。寸箋料未許。春信偷覺。一束相思。可奈伶俜。憤與西風梳掠。緘愁緘恨。還緘淚。任蠟燭、芳心拋卻。待雪殘、重結清游。好覓朝川池閣。

摸魚子

長至前夕。借芙蓉初。琴南飲衍石齋中偶述。

浣冰毫。擘箋題句。宵分絳蠟重翦。玉珂風外閒身在。恰趁翠尊寒淺。

梅信緩。問半萼吹香。瘦影供誰眷。天涯念遠。但蘭佩浮湘。亭向桐圭訪
古。庚長記故人面。新聲倚。換羽移宮難慣。旗亭按拍都倦。宣南坊
裏聯吟處。只有盍簪堪戀。塵夢短。算買得鶯鄰。何必論鄉縣。荷衣倘
換。駕一葉沙棠。吳根越角。要結鷺鷥伴。



金梁夢月詞下丁丑至辛巳

夢芙蓉

集賢院有舊井清徹可鑒。余往來兩年中。未見有挹取者。豈以地多陂澤。無事汲深耶。

芳游迷豔綺。認頽垣古甃。蔓蘿交曳。畫闌回首。零落舊題字。斷魂烟雨裏。綠珠門小。應閉。半角西山。知顰蛾怨曉。曾否黛痕洗。好句屯田漫擬。一酌清冷。識曲今誰是。鬢絲風影。人與露桃悴。素波渾不起。鹿盧修綆空繫。夢隔仙源。但銀瓶信杳。難問絳河水。

摸魚子

讀元遺山芳華怨樂府漫題

黯消魂。故宮遺事。金源舊恨重數。鴟鷄絃上。芳名認。一片冷雲吹雨。

都尉府。憶阿海香閨。近接東華路。承恩未許。但破鏡光中。小車油壁。
還送燕歸去。娃兒曲。枉了巫峯朝暮。銀紅休按花譜。花開花落天
難問。莫爲綠鬟深訴。君記取。只幾日青城。寂寞春無主。人間最苦。算
杜宇聲聲。摩訶院裏。纔是斷腸處。

望湘人

石黼庭同年以畫蘭索題。戲拈此調。

記幽坊喚酒。佳節試燈。翠屏新曲曾願。冶葉柔情。媚香妙譜。小影華
年偷訴。皓腕清襟。楚騷遺韻。仙裳休妒。正石家、金谷留看。底事花隨
春去。愁思江南路阻。歎凌波步遠。鞦韆塵難駐。問解佩吳宮。可似夢
雲湘浦。靈根種恨。風條傳語。那識題箋心苦。不忍見、一紙芳魂。化作
橫塘烟雨。

澡蘭香

重午用夢窗韻

閒情鬪草。雅戲牽鉤。節序被人喚覺。銀燭蕩漿。鏡曲分箋。長是夢游空約。盼飛鳧、音信難憑。相思榴紅破萼。小簟涼痕。困倚汀蒲洲蒨。重話河橋往事。細葛風前。暗消吟魄。塵梁去燕。彩箴招蠅。枉卻紺紗帷幕。試蘭湯、新浴還慵。誰伴芳尊共酌。但認取、艾葉朱符。餘香襟角。

高陽臺

七姬權厝志。吳巢松編修屬題。七姬皆淮張時左丞潘元紹側室。志爲張來儀文。宋仲溫書。平江貝氏千墨菴重刻。

黃葉風多。青苔篆蝕。殘碑尙認。嗟痕。怨魄歸來。愁他蛺蝶羅裙。一絃一柱哀琴語。打羣鴛、枝上消魂。最無端。玉骨淒涼。娟袂難分。 娃宮誰問傷心史。只潘花小字。猶紀貞珉。妙墨重鐫。依然金盃千春。埋香那覓三興土。掩顰蛾、灰冷齊雲。但從今。墓草年年。休長情根。

滿庭芳

遼后洗妝樓

眠柳梳烟。荒池洗月。翠簾不卷春愁。暗塵珠絡。芳豔未全休。飛燕新
詞漫擬。簪花格。墨妙誰偷。憑欄處。鞦韆金帕。玉腸斷。舊風流。凝眸。佳
麗地。脂函鏡匣。鄉冷溫柔。但捺鉢當時。諫草還留。可惜琵琶調苦。回
心院。枉費綢繆。焚椒恨。天書練影。三十六宮秋。

綺羅香

車帷

繡幙圍香。文裯藉玉。一夕屏星催換。怯試秋心。恰好夢深寒淺。認罽
密。犀押勻排。愛絨唾。蝶衣新翦。問流蘇。四角低垂。越娥網住。定誰見。
驕驄佳約未準。剛是蝦鬚替卻。圓晶雙縮。雲母輕盈。藏得幾分春
怨。似相看。帳裏花枝。漫暗憶。鏡中人面。盼愔愔。油壁歸來。畫簾風外

卷。

瑣窗寒

風窗

翠箔欺寒。瓊鉤挂月。一番風緊。疎櫺半掩。隔斷滿階秋影。蘸銀箋、油
花暗滋。午妝粉指新留印。怕重來燕子。小門深閉。舊巢難認。方鏡。
頗黎襯。更玉墜低懸。獸環相並。朱繩細縮。比似井闌斜引。玳梁深、輕
籠篆烟。繡幃窺處。還易暝。未愁他。晝燭屏前。下簾紅袖冷。

又

集賢院連雨

潤逼窗紗。涼侵簟竹。頓添憔悴。將徐乍緊。做出幾分秋意。對銀屏、幽
懷暗牽。素衾清夢誰料理。最憐他此日。紋疏靜掩。袂衣初試。空指。
前游地。又冑石苔滋。井闌愁倚。回波漲晚。翠點一池萍碎。帶蒼烟、歸

鴉倦飛。暝陰未破雲更起。但虛空、冷蕩柔絲。遠天都是水。

采桑子

兄子汝笏娶婦張氏。同年潤夫農部女。結褵三日。婦忽感疾。旬餘竟逝。時丁丑七月十三日也。汝笏將其遺蛻歸里。爲賦懊惱詞三首送之。

人間誰是消魂者。昨日鸞琴。今日霜砧。三日離愁海樣深。鬱金香冷知何處。悵望春陰。領略秋心。綠蠟前頭淚不禁。

又

十三數到哀箏柱。憔悴牽牛。鵲駕難留。銀漢橋邊一夜愁。從今怕說黃姑渡。短夢悠悠。舊事回頭。但見秋光莫上樓。

又

紙灰飛遍關山路。山也重重。水也重重。滴盡珍珠酒不濃。雙棲漫

譜雕梁曲。花也匆匆。月也匆匆。燕子歸來似夢中。

喜遷鶯令

綠飛絲。紅退萼。芳景故淒迷。不堪花信到將離。剛是斷腸時。金鴈
箏。鈿雀扇。爭似舊時曾見。情絲牽斷夢魂中。枉自費東風。

又

夢纏絲。魂怨抑。前事漫思量。朱樓高處見垂楊。那信是他鄉。鶯自
憐。花自惜。此意甚人知得。縷金鸚鵡繡羅襦。曾有淚痕無。

風蝶令

唾碧凝痕重。流黃照影遲。姮娥依舊弄清輝。我自不曾真見月圓時。
蝶戀前宵粉。蛛牽後夜絲。酒邊心事問伊誰。除下鏡光鐙影少人
知。

又

琴語回瑤軫。簾波暗玉鉤。芳心一寸鎮難留。消得三分病與七分愁。
藥裏拋仍在。苔箋卷未收。薄寒無賴倚羅裯。可是禁愁禁病又禁秋。

浣溪紗

誰築閒園倚近坳。小山叢木帶回汀。等閒水石費經營。珍館幾時
迷舊跡。綺樓無地著春情。蛛絲塵網可憐生。

又

紺瓦雕甍想像間。薄陰吹冷土花斑。幾人指點舊平泉。橋水暗敲
珠錯落。巖雲低映玉孱顏。當時祇認是家山。

又

竹石三分水二分。水邊蜂蝶易消魂。不堪重憶舊時春。可有青苔
黏畫屨。似聞芳草鬪羅裙。丁香花謝不關門。

又

護玉籠香翠閣幽。名花對影看梳頭。此中人說是迷樓。夾幕暗通
箏阮語。重簾分管燕鶯愁。紫雲何處恨悠悠。

又

車馬如雲待漏遲。未明天已玉驄嘶。綠波橋上漫依依。過眼綺羅
猶昨日。傷心冠蓋似當時。無因說與白鷗知。

又

鞭影匆匆指落霞。輕衾涼簟定誰家。不辭小立倚汀沙。但有藤蘿
皆映帶。更無藻荇不橫斜。生憐消瘦到秋花。

又

扇底風痕弄夕涼。酒醒人試藕絲裳。新蟾鉤樣照橫塘。蟬雀有時
還獨語。鳧鷖何必定同行。澹烟清夢怕思量。

又

白鶴憑誰信手招。銀瀾對影轉無聊。悶來何計覓雙橈。秋思可堪
人寂寂。仙源依舊路迢迢。微波原自不通潮。

鵲橋仙

龍鬚席

桃枝遜滑。藤根讓潔。入尺風漪鋪水。象牀誰與問遺簪。有幾點、瑤池
清淚。龍鬚草一名王母簪冰絲細裊。花紋巧織。還似鮫宮新製。任人舒卷總無心。
不化作、淒涼雲氣。

高陽臺

用碧山韻答衍石路河舟次之作。兼懷琴南。

帆角敲烟。船脣墜葉。一番涼雨澌澌。惜別山容。城尖仍倚愁眉。潘河
門掩珠巢冷。問紫駟、可記當時。鎮無聊。醉醒厭厭。還倒金卮。燈窗

待寫懷人句。寄垂虹南北。兩地相思。縞夜清霜。夢魂依舊來遲。來時
定折寒梅贈。道此情、惟有花知。但悽然、鬢影緇塵。青鏡成絲。

摸魚子

去歲長至夜。飲衍石齋中。余有浣冰毫之作。今一載矣。琴南、
衍石、皆以憂去。天寒多雪。索居匙歡。復次舊韻成闕。並索芙
初同賦。

送歸人。去帆兩兩。平蕪千里如翦。分襟憶到題襟日。又早蠟梅香淺。
魚素緩。空領略、淮河津口魂雙眷。八月得衍石天津書。十月得琴南東浦書。天長水遠。怕星飯

填愁。塵衫浣淚。難認舊時面。東華客。十日閉門都慣。相如今更游
倦。鴛湖鶴市空中想。翻是他鄉情戀。吟興短。漫贏得、秋來夢不離江
縣。吹葭節換。試問訊劉郎。深杯雪屋。燈影剩誰伴。

又

和潘吾亭同年再疊前韻

倚香篝。小樓聽雨。春衫誰與裁翦。路河橋下波千尺。比似別情還淺。
腰帶緩。更海燕傳書。碎語增悽眷。瓊枝恨遠。恁夜舫牽衣。垂髻斷影。
長隔鏡中面。君時有金
瓶之戲。城南路。烏帽黃塵竹慣。新詩水部吟倦。西湖
西子頻牽夢。未信朝簪猶戀。生計短。只地上栽花。那是君家縣。思鄉
酒換。剩玉雪佳兒。芸編問字。燈火紙窗伴。

又

戊寅三月二十一日宿香山三山菴。次日循菴後小徑登龍
王堂。眺覽久之。喬松百尺。泉聲冷冷然。東墻玉蘭二株。已半
謝矣。

野橋西。霽嵐千疊。攀蘿待訪深隱。鐘魚記否曾來處。一衲故吾堪認。
蓮漏緊。任小夢眠雲也。覺巖棲穩。芒屨曉趁。道咫尺龍堂。山靈喚客。

一徑入秋蚓。還惆悵。早是瓊苞香褪。瑤臺空墮珠粉。看花眼冷春明路。花裏翠禽知恨。泉更引。照鏡底青螺。懶說仙源近。催歸未忍。料倚杖哦松。題箋選石。後約總無準。

又

暮春徧游近郊諸蘭若。覺生寺大鐘。萬壽寺白皮松。尤勝賞也。

散幽襟。近郊春晚。香臺游屐爭試。半幡風外招尋慣。吟思塔鈴遙墜。陰滿地。望不斷。霜皮雪幹松烟翠。鐘樓倦倚。待磨洗前朝。鯨魚篆刻。梵文幾行字。僧寮話花影。竹房深閉。落花更掃階砌。杏壇管領春風帝。我亦官閒如此。清磬裏。渾未識。禪心宦味都相似。誅茆便擬。指蒼筤林西。斜陽一綫。山在冷雲背。

三姝媚

海旋集賢院有水石花柳之勝。余歲或數十信宿。戊寅春暮。獨游池畔。寓物賦情。弁陽翁所謂薄酒孤吟者也。

交枝紅在眼。蕩簾波香深。鏡瀾痕淺。費盡春工。占勝游惟許。等閒鶯燕。步屨廊迴。盈退粉。蛛絲偷罨。小影玲瓏。冷到梨雲。便成秋苑。容易題襟催散。又酒逐花迷。夢將天遠。繫馬垂楊。但翠眉還識。舊時人面。暗數韶華。空笑我。櫻桃三見。剩有盈盈胡蝶。西窗弄晚。

又

馬湘蘭小硯。爲程春海同年賦。

蟾蜍清淚灑。暈脂痕猶新。粉香初研。翠斲妝樓。想鏡中眉樣。半蛾偷借。鬪葉閒情。借象管。鸞箋消夜。悄炙紅絲。沈水濃薰。棗花簾下。髻冰姿妍雅。背嬌小像恰手撚蘭枝。練帚歌罷。舊匣空尋。甚石橋新月。尙矜聲價。過眼雲烟。隨夢影。銅臺飄瓦。認取南朝遺墨。清溪恨惹。

催雪

衍石抵京。招同吾亭水部。陳友石農部。錢味根孝廉。消寒小集。同雲如幕。雪意垂垂。坐客各有新句。余亦繼聲。

簾罨重陰。燈暈半花。密坐貪依屏背。話冷宦心情。竹深門閉。客似寒鴉瘦影。慣倦羽。相偎銀雲底。琴邊試問。清宵款語。冶游知未。燕市十年矣。是幾度分襟。幾番搵袂。又朔雪關山。歲華如此。儘覓紅螺換酒。釀不到。鱗鱗鴛鴦水。料只有。藤角吟箋。猶認月波題字。

丁香結

燈花和衍石

窺幙蛾輕。綴窗螢小。烟影玉荷低襯。是幾番風信。恰喚起。細朵盈盈紅暈。似華還似萼。妝臺倚。笑靨未穩。無端三點兩點。慣向晶匳偷印。憑認。比蟻子垂絲。好夢飛來定準。麝炷分香。魚膏蘸碧。暗催春近。

良夜鴛枕睡覺。早與傳芳訊。重叮嚀佳約。休待縈腰瘦損。

瑤花

吾亭偶談汴中春覺菜之美。余不嘗此味。亦十載矣。

雪殘近陌。壓擔泥香。記腰鎌親覓。鮮芽破冷。新翠翦。幾縷冰痕猶溼。
廚娘好語。道一信。花風先識。伴罽袍。公子樽前。恰認穉春顏色。銅
街錢臘頻番。枉十度春來。芳訊長寂。愁春未醒。惟是有。海燕曾傳消
息。庾郎清瘦。況雋味。鄉園空隔。但五辛盤底。年年夢繞。玉津萋碧。

真珠簾

春影

豔陽畫出三春景。漾空濛。幾縷春魂猶凝。搖曳絮飛時。弄瑣窗烟冷。
一桁輕絲吹不斷。被燕翦。捎來難定。幽境。儘看朱成碧。玉闌閒凭。
何處笑倚娉婷。有娥池省識。東風妝靚。半面倩誰描。更柳遮花映。偷

眼睛蜓窺未足。似鏡裏、燈前曾竝。人靜。奈簾波緩蕩。碧雲催暝。

瑞龍吟

擬周美成

吟香路。重認淚點娟筠。唾痕芳樹。依然咫尺天涯。斷魂絮影。知他甚處。信音竝。還是墜蛛塵網。半捎窗戶。無聊強摺紅箋。醉來試倩。流鶯寄語。惆悵雕闌猶在。晚花羞暝。垂楊慵舞。應想舊時。堂前巢燕非故。琴心贈別。顛倒聞詞句。何曾見。珠幃夜悄。銀屏微步。佩解人歸去。帕羅尙縮。愁絲怨緒。簾底波千縷。空負我西窗。秋衾涼雨。話殘夢裏。一燈誰絮。

念奴嬌

己卯五月十四日。集賢院池上憶壬申丙子與琴南兩度游此。用白石韻。

荷池載酒。話閒雲會約。同舟仙侶。一葉浮香人。不見。還對冷紅無數。
此際江南。娟筠小簾。坐穩橫塘雨。相思賦就。畫屏多少新句。笑我
塵鬢絲絲。回瀾照影。花裏頻來去。半枕圓波。鷗外夢。空到沙汀烟浦。
釣綫垂風。吟驪倚月。誰解留人住。微茫雉堞。柳邊愁認歸路。

高陽臺

鵲語偷傳。烏棲暗警。宵分又駐鸞車。七載重看。秋期彈指無差。瑤階
擁帚知何事。勸鳳翎、休埽閒花。話仙都。小劫匆匆。愁裏年華。巫雲
漫逐西風去。聽黃雞、怨曲往事空嗟。酒冷芳尊。可堪殘醉消他。盈盈
儘隔牽牛渚。問情波、流恨誰家。但思量、咫尺銀灣。不是天涯。

惜秋華

耦庚繼室鄭宜人哀辭

賦筆催妝。映宮袍秀色。鸞釵相倚。春枕正酣。驚心杜鵑曉起。前番淚

溼湘筠。賴夢好。揚州重締。媽香更。匆匆褪卻。蕃釐仙藥。 招悵畫屏底。歎明珠乍剖。枉懸嬌悅。鏡臺近。繡襦認。幾回凝睇。人閒過。眼花。但錦裯。倩魂猶繫。愁悴。問他年。左芬知未。

摸魚子

疊前韻爲衍石賦鴈影菴。時將移居玉河橋。

卜幽居。石橋西堍。衡茆蔣徑。催翦匆匆。過影還留影。恰照玉河清淡。 箏柱緩。倚繡閣。雙聲一例。神仙眷。香心寄遠。比舊日。褊襪。羅浮粉翅。 長印鏡。瀾面。君著居曰太常仙樂所止齋隨緣好。傳舍年來。棲慣。何愁素羽飛倦。分明桑下。曾三宿也。似碧潭。痕戀。歸夢短。又誰道。等閒衾枕。非鄉縣。 賣漁譜。換算小字吟秋。涼音喚侶。我亦水雲伴。

又

衍石遷居未果。重拈前韻。爲鴈影菴問。

認巢痕。一枝初定。禁他客燕雙翦。玉河最好嬉晴綠。偏是詩人緣淺。
新句緩。枉付與、春波橋下鷗情眷。會心未遠。且回首吾廬。江亭咫尺。
繞舍水三面。君知否。鴈影澄潭留慣。銜蘆到此應倦。菰蒲葉葉幽
尋近。料也雪泥還戀。塵袂短。又何必、衡雲定覓湘南縣。歸飛羽換。但
寄意潘郎。箋傳素翼。莫忘舊吟伴。

吾亭時將乞歸

金盞子

彩筆休拈。錦字慵題。病餘無力。又墜葉吟秋。疎櫺外、閒了翠雲消息。
懶聽桂苑嘯烏。引瓊簫悽惻。西風淚、花冷素蟾。偏是廣寒人隻。倦
燕忽如客。待歸去、蒼烟暗故國。沈沈繡簾易隔。宵來夢、比似曲屏還
窄。看取小扇塵生。嗟空箱拋擲。消魂處、愁縷恨絲。機聲催織。

梅溪夢窗
竹山碧山

皆看金盞子詞。而調各不同。此按花外譜爲之。

三姝媚

己卯中秋

澄輝看漸展。數圓期。禁他絳霄人盼。盼到良宵。又露華啼溼。一規珠汗。鏡彩分明。憶路隔、銀橋曾見。竟夕相思。青嶂魂迷。玉樓吟倦。何處覓裳歌按。但藥杵聲停。粉奩妝換。困倚天香。賦舊情爭被。曉風吹斷。破斧誰攜。空暗結、吳郎秋怨。望裏山河小影。輪孤夢短。

金縷曲

次日見吾亭詞。倚調和之。

桂苑悽芳訊。黯消魂、亭亭鏡影。做成眉暈。碧海青天依然在。偏是圓規難認。漫重溯、春前幽恨。兩度傷心秋更苦。料嫦娥、淚也金波墮。千里夢、幾曾準。清游但說良宵近。望嬋娟、瑤臺笛裏。舊情休問。羽蓋霓旌經行處。天路閒愁無盡。待傳語、纖阿紆軫。露腳斜飛銀兔悄。絳霄長、誰寄人間信。燈炷落、漏聲緊。

應天長

鶯花近甸。鴻雪去程。依稀夢境堪覓。記否那回攜手。汀波戀餘碧。垂
虹影。還自直。有幾許。倩魂消得。畫眉冷。走馬人來。鷗鷺曾識。回念
別離時。陌上香泥。羅帶爲誰拭。怕說繡驕行處。鞭絲墮秋色。前蹤認
如過翼。儘喚起。暮愁千尺。斷橋外。細雨慳慳。重問村驛。

陌上花

題仙山圖

神山望裏。分明幻出。玉樓珠榭。碧晃金迷。攬取幾多姚冶。仙源近接
長生路。髣髴紫蘭人下。眷游情不是。闋風元圃。等閒圖畫。漫相看。
夢影雕甍倚處。月斧雲斤無價。鳳管吹空。一曲綺筵歌罷。天錢辛苦
誰贏得。卻向黃姑親借。但沈吟。怕說冰夷。飛蓋翠瀾生也。

解連環

九日登香山北麓宋普慶禪師塔院

晚秋西郭。趁車塵路隔。勝游初約。步靜窈。幾折雲林。早嶺接梵宮。澗
橫經閣。片碣招尋。道舍利、當年曾託。歎滄桑過眼。古井斷垣。還見歸
鶴。風鈴甚時喚覺。話南朝舊事。幾度花落。向定裏、佳節重看。又積
蘚暗封。柳邊門鑰。未冷禪心。爲白鴈、飛來愁著。任匆匆、載詩載酒。翠
屏半角。

浪淘沙慢

梓桑路。沙屯廢館。浪擁荒驛。空約傳書素翼。鄉心萬縷似織。任極望
南雲天咫尺。遠山外、烟影難覓。斷夢倚斜陽黯無語。虛堂自愁入。
悽悽。漲痕舊隱拋擲。傍岸柳依依凝眸處。淚雨都暗滴。嗟歲晏哀鴻
零亂誰宅。繡衣畫戟。知甚時驄馬相逢人跡。菱鏡光銷腰圍窄。年
華晚、坐看箭激。料應比、湍波流更疾。恨歸去、不附星查。十二載、塵衫

冷透長安陌。

綺羅香

香篝

蕙炷藏春。湘筠借煖。曾說秦宮遺製。金屋攜來。有約鏡邊簾底。描一幅、象篔疏花。護幾斤、鵲鑪沈水。向烟絲、認取檀痕。斷魂誰與篆心字。
蘭釭紅穗未滅。想見都梁乍爇。銀屏無睡。犀蝶雙雙。解了又還重倚。好商量。坐久添衣。自消領、夜闌偎被。儘從他。畫鴨燒殘。繡幃慵更啓。

慶春宮

去臘衍石贈水仙數本。花事既畢。久置牆角雪窗。偶一檢視。抽葉已寸許矣。用碧山韻成詠。

瑤瑟春愁。銅盤鉛淚。寸緘冷護殘雪。冰縷方凝。塵封初啓。玉簪小翠

堪捻。襪羅歸去。鎮回想。飛瓊話別。相思天上。鵝管淒涼。爲伊吹徹。
漢皋佩杳誰憐。翦葉移根。幾番悽絕。悄夢禁寒。微波寫影。應是香心
猶結。曲屏吟繞。怪詩屐。宵來漸折。仙魂凝盼。出水亭亭。半眉新月。

東風第一枝

十二月廿一日立春。時快雪三日矣。

帖翦宜春。詩吟餞臘。重陰偏滯檐角。篆烟金鴨。仍含豔情。翠禽未覺。
韶華喚醒。似夢裏。東君曾約。甚曉來。賞柳評花。還是凍雲迷著。風
乍起。綵旛易落。寒更峭。麝篝漫卻。俊游擬拂銀鬚。情魂尙假繡幙。天
邊絮粉。且休問。陽梢紅萼。待畫鼓。敲出雙聲。聽取試燈妝閣。

更漏子

庚辰元夕。同陳小雲二解。

錦街燈。燈市雪。還是消魂時節。羅幌底。繡屏中。春寒四面風。蘭缸

爐。春明話。一十二回元夜。今昔恨。去來時。去年人未知。

又

酒邊心。心上事。信杳故園千里。心易醉。酒難醒。夜闌燈暈生。欣相見。愁相盼。明月今宵恨滿。君鏡水。我金梁。夢來誰短長。

芳草渡

朝非雨。暮非雲。雲如絮。雨如塵。百花時節閉重門。花有約。春有恨。最愁人。訴春怨。春又半。裊裊晴絲一綫。憐春瘦。爲花顰。花一片。飄得斷。是春魂。

浣溪紗

瀉地銀河到海遲。橫波脈脈信來稀。夢回吟得水鄉詞。繁塔又添垂釣處。夷門恰有喚船時。斷腸風景定誰知。

又

帶水何心說故鄉。隋隄秋色夜傳觴。可堪衰柳玩清霜。仙手有人
拋月斧。通眉無句覓詩囊。禁他冷葉不淒涼。

又

冰雪河梁不見春。欲迴星漢問迷津。此中何限未招魂。尙有燕鶯
爭煖樹。可憐蜂蟻是微塵。等閒天氣判寒溫。

又

倦眼淒迷望轉空。悔將夢語託星槎。春明門外似天涯。烏鰲書戍
還易滅。青鸞信好未應差。一年春事又桃花。

好事近

紙鷲

片羽又青雲。搖颺半天春色。莫羨兒童牽引。怕東風無力。微茫纖
纈繫虛空。遠影定誰識。偏是綠楊烟外。有流鶯窺得。

絳都春

秦敦夫前輩出所藏冒辟疆姬人金珮美人蕉畫冊索詞
風光幾信。儘描出雉皋。當年花韻。自翦翠綃。點筆曾看。敬蟬鬢。碧腴
乍展。痕猶嫩。似人影。單衫紅襯。染香亭上。憑誰遞與。畫欄芳訊。吟
穩。蕉窗秀句。問名字。尙見。金明玉潤。素月半規。小篆盈盈。芳心印。螺
青寫葉。春來恨。認水繪。淒涼眉暈。任教重覓。秦淮舊時豔粉。

荷葉杯

忘了梅花憔悴。鄉思。休更託微波。翠禽枝上好音多。無奈客愁何。
聞道章臺人去。飛絮。風影太天斜。亂紅門徑鬧蜂衙。門外是誰家。

又

釀得春光如醉。清淚。無賴溼愁紅。爲誰香閣掩芙蓉。山枕倚重重。
迤邐清明時候。依舊。烟雨暗芳辰。曉窗天色近黃昏。同是夢中人。

南鄉子

宜子孫洗

璧月巧摹形。土暈銅花別樣青。硯北何人頻拂拭。輕輕。滌盡霜毫句未成。小篆認分明。芳草宜男偶得名。一例螽斯聞好語。盈盈。水拍銀盤弄化生。

又

和小雲立秋之作

扇影尙依依。秋到梧桐第幾枝。天上西風憑問訊。來遲。且爲清陰立少時。筠管強裁詞。可有微涼入鬢絲。昨日情懷今夕夢。尋思。悶裏閒中各自知。

玲瓏四犯

虎邱春泛圖。爲張初白題。

烟柳回塘。颺畫漿聲中。斂翠低展。客與香迷。一舸鏡瀾徐轉。鶯語燕
語難分。但醉倚、好花人面。數舊游。彭蠡聲上舟繫。忘了小姑偷眼。四愁
平子吳歛遣。漫沈吟、玉樓歌按。越娥佩響從歸去。春共橫波遠。空付
媚粉暗塵。蕩冶葉、倡條零亂。問半眉山色。船脣篷背。黛痕誰見。

喜遷鶯

珠巢街新居。古藤交枝。冷翠欲滴。詞以賞之。余在都門。凡四
移居矣。

六街塵外。喚蠟屐問春。春應還待。娥月迎門。媚枝窺戶。吟破一庭蒼

靄。簾紋乍移苔點。闌角斜牽。蘿帶寄情處。倚新聲多幸。鶯鄰堪買。

石衍

居最

空怪。槐巷裏。燈暈夢回。早是圓陰改。客與琴孤。家如舟泛。秋影

幾絲同載。試將凍蜂催醒。有約濃花。須再倦游。讎念雙藤舊侶。題襟
誰在。

瑣窗寒

衍石贈詩云。相思纔隔幾重垣。蹇騎誰知日過門。去每匆匆
歸又懶。不曾入座領清言。散衙容易夕陽斜。燈火詩書興豈
賒。日日晤君君未覺。忍寒高影自黃花。巷南巷北雪未消。七
十五步憐迢遙。

原註。君語余云。昨訪
君計行七十五步。

小詩抵作寒宵話。黏壁長應

慰寂寥。賦此奉答君時復將卜居玉河橋。故後半及之。

掃葉門深。衝泥巷淺。雪殘猶凝。清言佇久。依約夕陰吹暝。怪衙參催
歸太遲。忍寒負卻黃花等。對藤枝絡架。晚來還是。凍禽聲靜。萍梗。
終無定。正話到城南者。番鄰並。河橋舊約。又說玉虹腰冷。占新巢。誰
家畫梁。笑人忙劇春燕影。問何年。三塔吟鶯。喚教鄉夢醒。

澡蘭香

蝶蘭和小雲韻

羅浮舊侶。仙跡曾棲。一翦洞雲溜碧。花迷試夢。橘蠹淹秋。恰好舞衣藏得。問匆匆。粉怨香愁。情絲因誰暗織。壁鏡分明。可念春來消息。

看取團圞樣巧。中有柔奴。玉腰纖魄。翩飛小影。闕到枯形。密緒尙憐敲側。付蘭閨。摻手親繅。卻恐蠶娘未識。剩幾片。芳草宮斜。羅帶空憶。

東風第一枝

辛巳人日齋宿翰苑。燭花燦然。爲拈此解。

眼顚迷烟。脣朱綴蠟。依稀光透簾幕。乍疑錦羽銜來。未許紺紗障卻。嬌春穉蘂。有歸院。金蓮人約。向夜闌。小簇疎紅。恰認半簪梅萼。官梅幾許紅萼

未宜簪白石翁人日詞語也。試照影。一枝暗託。待破冷。數椒尙弱。任他芳信天街。二十

四番喚覺。陽和未準。但背倚銀屏斜角。儘化作粉翅雙蛾。飛趁玉堂鈴索。

早春晴暖。落鏡後風雪淒然。藤蔓欺寒。花事殊寂寂也。

喚幽禽夢醒。問急響、花鈴誰掣。試晴扇香。香心如倦蝶。弱翅猶怯。暗想西園事。鏡中孤影。歎好春難折。淒風夜半吹還徹。細糝游塵。斜迎舞雪。長條凍添冰纈。又因循錯過。燈市佳節。寒宵情切。按清歌乍闕。待向朱闌底。尋步屐。而今怕理吟篋。任紅遲露萼。綠拋烟莢。探芳景。俊游空說。都則把、豔冶年光。付與恨眉嗁睫。金觴御。已是愁結。那更堪、聽取銀雲外。嬾娥弔月。

一枝春

珂里新晴。試清游過卻。悒悒坊陌。歡期暗數。豔景易成陳跡。旗亭喚酒。倩評跋、好春顏色。吟徧了、紫曲塵香。惟是燕鶯曾識。幽蘭素芬堪摘。怕東風認作尋常標格。琴心倦倚。夢裏水波空碧。何人寄語。但花外、玉簫知得。重看取、小字銀鈎。冷綉翠拭。

解連環

和片玉韻

寸箋休託。訴幽襟。忍見賦情絲邈。耐晝永、閒拂蛛塵。但錦羽夢孤。翠
綃緣薄。似水春陰。總化作、殘秋蕭索。對厭厭病枕。悶損鏡妝。誰寄靈
藥。芳尊自開下。若帶顰蛾酒暈。猶倚闌角。枉盼斷、淮上青山。渺天
際。黛痕等閒迷卻。浪跡依然。把柳絮看成桃萼。勸清游、半晴半雨。趁
花未落。

喜遷鶯

崇效寺看牡丹時余外轉西川脂車有日矣

祇園春霽。借春豔釀成。天然羅綺。鈴語微聞。衣香初染。幾度竹房聯
袂。瑞蟬又兼金蝶。一樣新來梳洗。話京洛。任尋芳年少。臙脂留醉。
凝睇。經院悄。疎箔翠油。誰與相料理。花雨輕沾。珠林低護。還是玉闌

愁倚。靚妝漢宮空賞。歸夢瑤臺仍寄。露華冷。贈東風。但有相思紅淚。
瑞鶴仙

四月六日出都。小憩蘆溝橋偶述。

柳絲征袂縮。試錦羽初程。玉驄猶戀。銅街佩聲遠。向天邊回首。故人
如面。藤陰翠晚。但怪得、琴樽夢短。有游蜂。知我心期。剛是褪紅曾見。
還看。珠巢題字。墨暈初乾。酒痕微眩。晴雲乍展。春已在、驛橋畔。問
柔波一樣。仙源流下。爲底人閒較淺。要重尋。京邑塵香。素襟漫浣。